

Nova banka otvorila Filijalu Tešanj

87. poslovnica kao most povjerenja s lokalnom zajednicom

Dana 14. aprila 2025. godine, Nova banka je svečano otvorila svoju 87. poslovnicu – Filijalu Tešanj, čime je dodatno učvrstila svoju prisutnost na teritoriji Bosne i Hercegovine. Otvaranje poslovnice u Tešnju, jednoj od najdinamičnijih opština, označilo je važan korak u strateškom razvoju Banke, ali i u jačanju saradnje s lokalnom zajednicom i privrednim subjektima.

Na svečanosti otvaranja prisustvovali su brojni gosti, predstavnici lokalne vlasti i poslovne zajednice, a događaj je obilježen toplom dobrodošlicom, simboličnim presijecanjem vrpce i uručivanjem donacije Udruženju slijepih i slabovidih građana Tešanj.

Predsjednik Uprave Nove banke, Siniša Adžić, ovom prilikom izjavio je: „Otvaranjem Filijale Tešanj potvrđujemo našu dugoročnu posvećenost lokalnim zajednicama širom Bosne i Hercegovine. Ovo je naša 87. poslovnica i ponosni smo što je upravo Tešanj dio naše mreže. Ova opština je simbol preduzetničkog duha, ekonomskog napretka i pozitivnog poslovnog okruženja. Nova banka ulaže u zajednice koje rastu, a kroz partnerski odnos s lokalnim privrednicima želimo doprinositi njihovom uspjehu i dodatno osnažiti privredu cijelog regiona.”

Dobrodošlicu Banci poželio je i načelnik Opštine Tešanj, Suad Huskić, naglasivši: „Tešanj je oduvijek bio dobar domaćin privrednicima. Svaki poslovni subjekt koji je došao u ovu opštinu, ostao je ovdje – zadovoljan, podržan i prepoznat kao dio zajednice. Dobrodošlicu želim i Novoj banci, sa željom da njeno prisustvo ovdje bude još jedan primjer uspješnog partnerstva između finansijskih institucija i lokalne privrede.”

U duhu društveno odgovornog poslovanja, Nova banka je ovom prilikom donirala 2.000 KM Udruženju slijepih i slabovidih građana Tešanj, pokazujući da investicije u zajednicu ne podrazumijevaju samo poslovne, već i humane vrijednosti.

Nova filijala, smještena na atraktivnoj lokaciji, dizajnirana je u skladu sa savremenim standardima bankarskog poslovanja i korisničkog iskustva, a klijentima će biti dostupne sve usluge – od svakodnevnih transakcija, preko kreditnih i investicionih savjetovanja, do digitalnog bankarstva.

U Banjoj Luci, 15. april 2025. godine
